

Kadoffel-Ärn

Daus unserm Heddebärich löbt häüt eener sei Schöf gräsche, dhinnem Rödi is sou e Wildnis, daß do nemmi dorchkümmst, unser Rauscheklinge der is scho seit dreißich Johr mit Fichte eigepflanzt un dübbe unserm Kerrewengert schtejn jetzt Häüscher. Uff all denne Schtückli sen früher unser Kadoffel gwaksche. Grummborn warn es Eenziche, was mer gnung ghat hebbe un ohne unser Kadoffel, do hedde mir die Griechs- un Nochgriechszeit wahrscheinlich net überschtanne.

Wenn die Grummborn zeitich warn, do sen mer naus „Kadoffelrausmache“ gange. Daus em Heddebärich warn mer uff de Rosels-Fritz un dübbem Rauscheklinge uff de Borchemeeschters-Vedder ogwische. Wenn die ihr Kadoffel rausgezackert hebbe, dann is immer unsers mitgmacht worn. Blous daus em Röüdi un dübbem Kerrewengert, do hebbe mer selbscht beschimme gekönnt, weil dort die Kadoffel rausghackt worn sen.

Egal ob rausgezackert odder rausghackt, es weitere war gleich. Die Kadoffel sen uff eme bräde Schträfe zsam-megworfe worn, links un rechts vom Kadoffelschträfe is es Gräüdi nogworfe worn. Wenn alli Grummborn haus warn, dann hebbe die grouße Läüt die grouße Kadoffel zsam-megläsche. Mir Kleeni hebbe die überich gebliebene Säükadöffeli in die Manne eigfaßt.

Wenn e Manne voll war, do is se in de Kadoffelsaack ausgleert worn. War en Saack voll dann is er zugebunne

worn. Daß mer gwöbt hot in was vor emme Saack die Säükadöffeli dinn warn, is an dem Saack unner die Schnur eefach e bisle Kadoffelgräüdi drunnergebunne worn.

Dann sen die volle Säck uffglade worn. Manchmols hebbe zwä Weibsläüt een Saack gedrahe, die Menner hebbe en Saack älee gepackt. Ich wäb no, wie ich do em Vedder als gnau zugeguggt hab, wie der des mejcht un wie schtolz ich war, als ich eines Daaches selbscht en Saack uff mei Akschel nuffhejbe gekönnt hab.

Dhemm sen dann die Kadoffelsäck entwedder uff de Akschel in de Keller neigedrahe worn, odder mer hot die Kadoffel übbes Mützloch direkt in de Keller nabbkollern gloßt. Mir hebbe sogar zwä Mützlöcher ghat, es eene is in des Fach von de grouße unes annere nabb zu de Säükadöffeli gange.

Am Ofang hab i gsagt, wie wichtich for uns die Kadoffel warn un daß mir fascht immer gnung devo ghat hebbe. Ausgrächert in de allerschlimmschte Zeit nämlich 1947 war des net sou. Do hots ewich lang net grächert, die Sunn hot wuchelang vom Himmel rabbgebrennt un die Hitz hot fascht alles kabutt gmacht.

In dem Jahr hebbe mir dübbe unserm Kerrewengert Kadoffel ghat. Wie mer die rausgmacht hebbe, do warn an dem Gräüdi nix wie kleeni Säükadöffeli dro. Des war no net es Schlimmschte. Die Kadoffel warn a scho ganz schrumpfelich un runzelich un sie hebbe ganz süß gschmackt. Mer hot se fascht net esse gekönnt.

